

麻城縣志卷之四

建置第二

壇廟

社稷壇在縣城北門外西隅明洪武初知縣趙乾建成化初知縣朱嵩重建 國朝雍正間奉文修建甃以石臺風雲雷雨山川壇在縣城南門外東南洪武初建成化初知縣胡琮改建縣東南先農壇在縣城南門外東南雍正五年奉文修建厲壇在縣北洪武初建

麻城縣志

卷之四

建置壇廟

一

文廟在縣東南朝聖門內建於宋代屢燬屢修詳見學校志

武廟在縣前街左同治間燬於賊駐守麻邑百勝營統帶參將向百福倡修其修竣年月與捐資督工姓名有碑記之在廟門內之左

文昌閣在北城曹家巷內乾隆己巳紳士丁胡周楊徐李張王梅宋董朱劉林趙等二十四人同建後因廢敗復公呈請歸闔邑捐資重修

邑人董天策募修帝君祠文天下羣奉 帝君矣抑知帝君之所自始哉自其神棲梓潼曰梓潼帝君自其司

籍文昌日文昌帝君其為帝君一也然此其後焉者原其始則西晉末生於越雋張氏者耳更原其始則十七世為士大夫而帝君者則未之前聞抑何代無士大夫其以士大夫而帝君之且千百世共帝君之無異詞者未之前聞迨讀帝君文云吾為士大夫未嘗酷吏虐民救人急濟人艱憫人孤容人過廣行陰騭上格元穹乃曠乎思恪乎慕曰此帝君之所以為帝君也歟天下有位尊而人弗之尊者德不稱其位後之人從而奪之有位弗之尊而人尊之者德克配其位後之人從而予之若帝君者所謂德克配其位後之人從而予之者歟予嘗跋焉仰止欲私建一所如登帝君堂私繪一像如親帝君面私懸其文於座右如聞帝君訓因以之風勵乎子弟抱此志而未就者有年一日里之僧佛旨云其廟旁有帝君祠年深頽廢慨然有重修之志自度力不從心思募邑中士大夫共輸以勦乃成夫邑中固多士大夫矣見人有休烈懿行特聞士中者則士樂推引之以為士重人有以休烈懿行特聞大夫中者則大夫樂推引之

麻城縣志

卷之四

建置

二

以為大夫重今帝君明明是士明明是大夫且十七世已為廣行陰騭上格元穹天下尊帝君而奉之者世世如茲豈非士大夫之所愛之慕之願效之而樂崇祀之以為士大夫重者哉且正不必士大夫也僧能立帝君祠肅然而瞻禮之誦法之則僧重凡耕者商者軍者蠢焉而狂狡者能立帝君祠肅然而瞻禮之誦法之則耕者商者軍者蠢焉而狂狡者亦重徒曰帝君上司文衡吾饗祀日隆名位可致是借修善之舉因之為謀利之資也帝君有靈為之代愧

馬王廟舊在縣署後燬於賊邑人移神位於文昌廟之右

廂

龍神廟舊在縣署之西前臨深池地甚爽塏被賊後僅留一楹邑人置軍火於內而移神位於文昌宮之左廂署縣

陸以龍神霖雨蒼生未可無專廟致敬與邑紳議定重建於西門外土主廟之右地近龍池足資潤物之用

火神廟在城隍廟之東宇官長朔望行禮與諸廟同

城隍廟在縣南洪武初建嘉靖辛卯署篆推官嚴肅暨知縣尙德恒重修明勅封顯佑伯秩正四品歲無特祀惟厲祭主之次則埒風雲雷雨壇

東嶽廟在北關廂縣人周宏佑題曰岱宗駐蹕自兵燹後三壇均被燬春秋時祭社稷壇及厲壇卽於岳廟致祭風雲雷雨山川壇在土主廟致祭

麻城縣志

卷之四

建置壇廟

三

土主廟在西門外相公橋之右廟東向兵燹重修祀紫微侯張七相公或以爲所奉卽宋邑令張公毅云

紫微侯廟在五腦山一在西門外一統志宋時縣人張行七當時以張七相公稱之毀沿江淫祠繫獄適有火災釋張捍之立止至五腦山人馬俱化邑人爲建廟嘉慶間邑人胡宗第等募化重建咸豐間廟被賊燬同治初邑人王大莖吳春山等募化重建遠近朝謁香火愈盛同治間粵賊竄麻官民保守危城屢荷靈應大府奏請奉

旨特賜靈感二字

舊志福主神宋時降生西蜀璧山縣張氏行七世稱張七相公其先人官大理評事母楊夫人崇敬三寶喜施濟因是誕神神生三月能言七歲通詩文尤好元理有神人見而謂之曰此子有夙因應以童身證道顯法於楚年十七歷游至麻城見民間多淫祠盡毀之祠主訴官繫獄三年值邑中火災神自知厄滿當出使白邑令以能禳解釋之跨烏騅執朱旌指火滅遂西行至相公橋人馬飛昇望者見其止於五腦山遂立廟山麓以祀之歲苦旱潦祈之必應民有疾厄祀之必痊湖山險阻呼之必安嗣續艱難禱之必吉遠近朝謁者無虛日宋封紫微侯明封助國順天王嘉靖中邑人劉莊襄公經畧甘肅用兵寧夏屢荷神佑立靈應碑於廟左以記其事毛聚峯為文碑至今存國朝嘉慶間教匪擾黃安福主顯靈匪遂遁竄咸同以來粵捻交煽境土釋騷屢著靈異助順剿逆邑中官民申稟大憲奏請加神封號奉敕加封靈感二字凡麻城之都門會館暨渝城宜昌沙市漢口所在城鎮會館皆以福主為祀楚鄂陳應善嘗

麻城縣志

卷之四

建置壇廟

四

為之傳梓行

邑人毛鳳韶紫微侯靈應碑記侯之為神也相傳以滅火災肇跡厥後持赤戟擁精兵卻僭亂有護國佑民之功故受封紫微侯邦人即於五腦山立祠祀之無間知愚凡遇乾旱瘟疫水火盜賊之變必以告於神其闡靈昭應不可殫述誠萬民之倚庇一方之主宰也故人稱為福主神云一日太保松石劉公謂韶曰吾何以答神貺昔嘉靖戊子秋予巡撫甘肅為母親初度辰逾七十甲子矣予以不獲侍養悲思有痛在手甚劇呼號之聲徹於重門之外弗自知也時大虜壓境不能出寤中夢福主曰賊已至汝奚在此臥以手按余起覺而輟痛如摘遂出理軍事獲全勝神之力也又吾祖諱夢者以羣忤繫之京時著令期而不至殺無赦先期一日吾祖方至江浦病餓不能興度不免矣忽有一人以紅戟持肉食之有頃而已知其為福主也遂如期而至太祖親釋其縛復異其材授彰州府同知神之力也吾何以答神貺昔許立碑今始成焉復以碑文請神擇於三人者許執事執事其勿辭韶曰公命之神又命之韶雖不文其

曷敢辭乃言曰嗚呼天人一理也感應一機也神也者效天之用以示乎人者也故感之善則善應之感之而不善則不善應之矣雖匹夫匹婦之微一言一行之懿猶不爽焉況以世法天民之秀豐功社稷之臣如公者有不隨遠邇而至者乎是故江浦之應以啟其忠也甘肅之應啟其孝也非私與也傳曰天之所助者順詩有之神之格思介爾景福其是之謂乎韶敢以是為記繫以銘曰道冠堯魏五峯雲仍儲精發秀啟我神明昭德顯功佑我生民眷茲太保望族徽聲忠孝文武著龜效靈江浦持危光啟前聞甘肅起疴以成大勳上答神貺立碑廟門昭祀罔斁秋而復春

化主廟在龜峯山頂神為鐵像每六月開山香火遠集

按龜峯化主不知何神相傳即宋之邑令張毅公嘗植萬松以庇行人具見載記今麻有惠政歲旱為民禱雨無不應者嘗同幕客蔣著等游龜峯愛其幽峻題名泐石後得道成神遂棲真於是山民間稱以化

麻城縣志

卷之四

建置壇廟

五

主至今禱雨尤靈應

岳王廟在縣南五里燬於賊邑人重修尙未復今存廟一

東西向廟前跪石人亦殘缺蓋做岳王墳之有秦檜万俟

尚也

邑人梅之煥建岳王廟引自古以忠死者多矣惟武穆岳王無論其經戰陳之處與不經戰陳之處以至婦人孺子廝養奴隸談及莫須有冤狀靡不髮指耻裂目慘心傷雖忠義之入人深哉亦其所以死者異也何者等死耳或主猜焉而死或勢屈焉而死或功成焉而死即均死於忠而人心悲憤不平之氣猶有所托以解武穆何以死哉金字旌忠繡旗標勳主眷隆矣兀兀痛哭沿海旋師南風競矣高鳥未盡良弓已藏以補天浴日之忱拔山倒海之氣區區一秦家小兒探囊而杌置之坐令一腔熱血不得灑於梓宮青衣之前賀蘭朱衣之側

而灑於獄卒之手也父子枕藉噍類無遺自壞長城爲虜報怨以極忠遺極冤以極冤鼓極憤以極憤繫極思則武穆王之不泯檜成之也乃予獨於王有異焉夫天下未有權奸在內而大將得以成功於外者一白面書生且猶知之以王之算無遺策獨憎於此哉洎乎風波片紙齎志沒地已矣百萬貔貅江上老兩宮環珮夢中歸此乾坤何等時而陰魂凝望墓木皆南猶眷然有恢復之思焉語曰明知無益事故作有情癡匪忠曷癡匪癡曷忠故曰其愚不可及也王方駿赤螭賓帝所俯視六陵悲來無地後之享不享何心獨計譖人者即巧於檜而適以相成任事者即危於王而有所不避是皆於今日人心國事有大關繫尸而祝之以風於有位使明哲保身之說不至爲畏縮者抵口而讒人罔極交亂四國亦庶其有多乎

宋賢祠在岐亭北二里許祀宋之方山子陳季常也地名

杏花村季常墓在焉 國朝康熙中岐亭同知于清端公

麻城縣志

卷之四

建置
壇廟

六

建咸豐中遭兵燹己未歲重修又於側增建忠節祠以祀

李忠武公續賓並在事之殉難者

舊志于清端公建宋賢祠引岐亭之有季常也非岐亭有季常乃季常有岐亭耳由來人以地傳者十一二地以人傳者十八九余每讀方山子傳因感其初在岐亭時韜晦勳閣庵居茹蔬岐中人士莫知器識迨東坡公一過杏花村坐蕭然環堵中依依有故人情一旦使其地與人並傳千古是黃州之有岐亭因季常之一寓而岐亭之有季常又因蘇子之一識故夫岐亭之得名良有以也余奉 命守鎮茲土將三載計三載中承委署郡邑者四監兌給賑者二暨詣 天顏自 闕下數月乃得還黃其閒僕僕奔走頗爲鞅掌是歲春朔之杪始偕岐中士子過杏花村謁季常先生墓尋昔時所謂蕭然環堵者竟不可得噫嘻賢人處此何今古落落多同乎爰與諸紳士約謀建茆椽數間於杏花村址邀士子讀書其中歲時伏臘豆雞壺酒奠飲於季常先生墓側

余聞光黃閒多隱君子後有賢人處此必以此都人士能深繙衣之好亡者尙爾存者可知自余來岐後俾賢人接踵俗美風醕庶幾乎大宋團練使一識之於前五百載重溫之於後坡公或不笑余之陋劣矣是爲引會稽宗稷辰岐亭重建宋賢祠並建忠節祠碑記古赤亭後爲岐亭在光黃之交爲守淮要鎮當宋神宗時中原無事有世家豪傑陳公季常先生隱居於此稱方山子初射獵山中意氣甚壯久之乃益韜晦惟嘯傲自娛蘇文忠與舊故迨謫黃州訪之於岐亭下杏花村大異之其生平蓋懷文武才畧不得用於世竟以隱終沒後卽葬於是邨之山原碑石至今存焉我朝康熙癸丑歲于清端公官岐亭司馬始與士流爲之建祠於墓前以方山子由文忠而傳祀陳必兼祀蘇故顏曰宋賢祠清端常講學其中云後數十年有邱公名賜書來丞岐亭復爲培植其墓木修葺其祠宇居民思清端之德卽祠中祀清端至今又歷百餘年矣前此已久不治近年更遭兵燹並頽垣徹甃而無存幸清端與後司馬之遺碑尙卧荒煙蔓草閒今署司馬王子省三剔薛濯泥而

麻城縣志

卷之四

建置
壇廟

七

讀之怦然動中與士民謀修復皆同聲稱願省三且謂眾曰光黃閒多氣節之士自粵逆擾黃一時義旅所聚明赴私鬪雖婦女亦皆曉然於死生輕重之故而無所於避幸迪庵李公掃蕩醜類廓清全黃方慶更生而戊午之春賊復由閒道竄入旬月之閒麻城黃安相繼告陷維時李公克復九江復親率一旅之師以再造此二邑民宜二邑之民於公三河殉亂後迄今感泣思念而不能忘也記曰能捍大患則祀之以死殉事則祀之蓋於舊址三楹外增建忠節祠以祀李公及在黃死節諸公而以麻安之死於寇者附祀焉紳民更莫不慨然以並舉爲當者遂集資鳩材興工於己未年三月而於九月望日告厥成焉後之人紹清端之蹟而崇宋賢推清端之意而勸忠節常則效而修明之以示嚮方善風俗則今日之舉其感發於人心風俗豈淺鮮哉省三於千里外馳書請記其事遂爲之記使鑲諸石

遺愛祠舊在縣署前燬於賊邑人近移祠於武廟後所

祀皆令長之有惠於民而未及請祀名宦者

忠節祠明代建祀宋殉節黃州府知府趙令晟都監王遠
判官吳源巡檢劉卓後燬於兵今重建於縣署東街與姚
公祠前後棟廟南向門西向從祀姓名詳見忠節列傳中
勅建前邑宰姚公祠

麻城縣志

卷之四

建置
壇廟

八

寺觀

東禪寺在東城明正統間建後李萬五重建

法華庵在西城陽基塘北岸

萬壽宮去福城庵數武

三元都會府在城隍廟之北御史毛鳳韶年七十建廟求嗣果應至今邑人求子者多驗

萬壽寺在西城有周思久題梵王宮及澄心方丈字

玉皇殿在萬壽寺左

傅元帥廟在城東民有瘟疫禱祠立應

麻城縣志

卷之四

建置

九

張王廟在城隍南之左供奉張桓侯

準提閣在城南城隍廟之左與萬壽寺隣兵燹後城中紺宇琳宮均為煨燼此地幽潔清靜近年重修三楹頗為安

禪靜處

華藏庵在古佛庵後

繡佛寺在北街梅司馬女澹然捨宅以繡為功課故名

周禮廟寶筏禪林夜雨偶成詩偶來依繡佛信宿歷陰晴客昧老僧覺詩心雨夜生小窗涵火力上院落鐘聲衰病非消渴逃禪未可名

古佛庵在北街西巷明邑人邱齊雲建中有古佛三尊歷劫

滄桑金身不壞而梵宇蕭條幾於佛頭着糞吁可慨已
惟邱書古佛庵三大字猶存

恒河寺近東城上與白衣庵相望康熙閒大雨水圯今俱
為洲半偈庵在東河岸

李巍半偈庵詩古寺臨河岸翹瞻在此登蝶飛花解
笑容以佛為朋水閣橋通郭樓成鶴傍僧行時僧續宜
上人魚課後笑倚一枝藤

東竺庵東河岸里許竹木森森鬱然蒼秀

李巍東竺禪林詩日籠松逕碧雨暗竹梢青棉豆收
將晚鐘魚遠可聽老來還興趣九日太飄零忽憶心
知友東南逐浪萍

麻城縣志

卷之四

建置
寺觀

十

針芥室與東竺庵相望

李巍針芥室詩針芥恰相投因緣不外求百年松竹
老三字古今畱野客逃名姓沙彌懶應酬詩情兼畫
理吟望遠峯秋

折葦庵針芥室閒壁相傳昔山水暴漲有一古木結成達
摩像宛然天成毫無斧鑿之跡寺僧取供奉之至今猶存

李巍折葦庵詩獨步河橋路來參古達摩天然畱梵
相道氣闕煙蘿成鬚眉相乃梵香根生境寂秋香逗心
空野趣多云何城市近今日偶相過

詹家堂在針芥室左數武知府詹洲建東側有祠宇一所
念力庵在朝聖門河岸

禪堂朝聖門南原在今義塚處後移建於此名新禪堂因施其處爲義塚

胡鉉晚步禪堂詩碧梧翠竹覆庭陰繞逕秋花闕苑深吸露寒蟬吟遠樹出山新月上平林風煙萬里橫宵雁城郭千家起暮砧共話老僧殊不惡長畱牛偈定禪心

火王廟供奉火神規模壯麗有黃梅五祖法眷投此住持

海潮庵與禪堂火王二廟咫尺道光間爲水衝圯今移置

火王廟於城內儒學右首

周之甦秋日同憬初星季二兄遊飛泉庵宿海潮蘭若偕允中清隱二上人待月卽事詩聽罷飛泉過水灣新秋纔得一朝閒蒲團坐白沙閒月短篷吹青江上山葉拂寒蟬聲寂寞燭燐清語淚潛涸忘言又自

麻城縣志

卷之四

建置

十一

忘歸去數點瀟瀟冷坐閒

翠峯寺南門外東里許

丁虞廷過翠峯寺訪松門和尚詩爲愛南郊好行行
頁遠公捫蘿無犬吠入逕有松風面壁鬚眉古題詩
筆墨工坐深忘共返斜日映林東

甘露庵在南關

三曹廟在塔兒橋

荷葉庵在西畝

半山寺在牛棚山東北隅

紫竹庵在小西門外

經堂在北關之西

玉閣在龍池南岸

海會庵玉閣閒壁

南堂廟在龍池北岸右爲烈女廟今頽

地藏庵在福元橋東

清和寺卽沙佛庵桃園北里許凌壁寺北二里餘後因水

壞移置東門內與東禪寺近

雲舫庵縣東二十里

大覺庵在土城區知縣趙蒼壁題額我愛其靜又此處金

麻城縣志

卷之四

建置
寺觀

十三

地知縣姜櫛題大地慈航知縣傅天培題

什子河寺在什子山北有石佛像

大竹園康熙甲子知縣邢嘉謨題額爲寶林門前有石井

泉水高一丈二尺四季水滿長流

九龍寺在東北九龍山有柏子塔相傳唐德宗四年虛應

禪師建塔九級頂覆以鐵鑊鑊側一柏蟠根而生每立秋

日午塔無影兼詳名勝

青龍寺隣柏子塔唐虛應禪師建

棲真寺亦虛應禪師建多古柏

鐘山寺東北五十里相傳至元間掘地得一鐘因立寺後寺廢鐘由鳳陂達河至大江遡流而上抵江夏鐵佛寺寺僧感夢得之

地藏庵東北五十五里陳家冲明縣丞周崇恭建龍潭水曲虎石峯環崇恭居宅卽在咫尺

定惠寺在縣東八十里天井山之北

邑人梅之煥重刻金剛經註解序余邑東八十里定惠寺不知建於何代東坡謫黃時有定惠寺看海棠詩至今山上多海棠後人於黃州城外建定惠院遂誤傳定惠寺在黃州城外其知在麻城山中蓋少矣嘉靖己未歲寺僧明祥採石山間夜見崖側有光疑而發之得金剛經木板一副蓋元無聞聰禪師所註也後有潛邑蚌

麻城縣志

卷之四

建置寺觀

三

湖市劉覺廣跋云師在奉甲站資福寺註經至元六年庚辰四月間其丈室生靈芝四莖覺廣爲之鏤板次年元旦夜夢諸神聚其所夫室中偶生芝不足異而覺廣之夢亦未足深信然木板埋土中至二百五十餘年今掘出又入十餘年字畫無一損壞者可謂奇矣年來余邑兵寇往來不絕山中廬舍燬者過半余慮此板并爲灰燼強寺僧移之江南乃堅拒余之請余因於白門重梓之或曰此板久藏土中無恙終當爲神物呵護子爲過慮矣余曰不然當其藏之土中自有任其責者人無與也今離於土矣責猶可他誘乎夫責在人人不任其責妄意冥冥中有佐佑之者而因以至於敗使不可追悔豈獨一經板爲然哉余於此重有所感也已
邑人鄒知新定惠寺記定惠寺去城東九十里其寺不知創自何代寺有海棠榦古花繁干霄蔽日爲邑志八景之一故題名定惠海棠相傳蘇東坡居黃時常遊其處與陳季常多所唱酬云更有異者寺外峭窟瑞靄光騰寺僧捫蘿攀險剖巖得金剛經木刻係宋梓古字迥異人家藏本蠹勿蝕鼠勿傷爭寶重之又傳寺後葬有

蘇小妹墓名公遊者往往尋之不得作詩弔之嗟哉蘇
小妹果葬定惠寺耶寺後果真有蘇小妹墓耶然則定
惠寺所以著名者以蘇小妹墓著耶以東坡遊著耶抑
以海棠著耶今有寺有海棠獨無小妹墓何也小妹才
與兄等果葬定惠寺側東坡當作有志銘而文集不載
豈遺之耶且東坡葬保母於黃今志銘尚存集中豈東
坡獨厚於保母反靳筆於小妹耶是耶否耶况麻城既
有定惠寺黃州又有定惠寺昔葛屺瞻宗師更爲黃州
定惠書院似東坡所遊則黃州定惠寺矣夫寺以海棠
著海棠又以東坡之遊而著然寺可以有兩寺豈海棠
亦有兩海棠耶則東坡所遊爲麻城定惠寺無疑今海
內人盛稱黃州定惠寺未嘗稱東坡遊麻城定惠寺豈
眞者不傳而不眞者反傳耶卽寺亦有遇不遇耶悲夫
謹案湖北通志定惠院在黃州府清淮門外蘇子瞻
以元豐三年二月至黃寓此院東有海棠一株因作
海棠詩後書開嘯二字勒石下有快哉亭前有海棠
軒後有洗墨池又有捫腹軒睡足堂今並廢麻城定
惠寺在邑東八十里地屬今木子店廟宇崇厰至今

麻城縣志

卷之四

建置
寺觀

西

猶存西近山東倚大河自黃至此二百二十里岐亭
至此百五十里其非當日坡公所厲可知讀東坡記
游定惠院益知其非是也邑中前明梅公國朝鄒
公定惠寺敘記皆以寺爲坡公昔游處毋亦安石爭
墩之故智歟然坡公賦赤壁借用周郎事以抒其論
後儒方鑿鑿攷證疑公之誤未免迂矣黃之赤壁公
可爲周郎借麻之定惠亦何不可爲公借乎故附論
之

蘇東坡定惠院海棠詩江城地瘴蕃艸木只有名花
苦幽獨嫣然一笑竹籬閒桃李漫山總粗俗也知造
物有深意故遣佳人在空谷自然富貴出天姿不待
金盤薦華屋朱唇得酒暈生臉翠袖捲紗紅映肉林
深霧暗曉光遲日暖風輕春睡足雨中有淚亦悽愴
月下無人更清淑先生食飽無一事散步逍遙自捫
腹不問人家與僧舍拄杖敲門看修竹忽逢絕艷照
衰朽歎息無人指病目陋邦何處得此花無乃好事
移西蜀寸根千里不易到啣子飛來定鴻鵠天涯流
落俱可念爲飲一尊歌此曲明朝酒醒還獨來雪落

紛紛那忍觸

又定惠院夜月偶出詩幽人無事不出門偶逐東風

轉良夜參差玉宇飛木末繚繞香烟來月下江雲有

態清自媚竹露無聲浩如瀉已驚弱柳萬絲垂尚有

殘梅一枝亞清詩獨吟還自和白酒已盡誰能借不

惜青春忽忽過但恐歡意年年謝自知醉耳受松風

會揀霜林結茅舍浮浮大甌長炊玉潤溜小槽如壓

蔗飲中真味老更濃醉裏狂言醒可怕但當謝客對

妻子倒冠落珮從嘲罵

又次前韻去年花落徐州對月酣歌美前夜今年

黃州見花發小院閉門風露下萬事如花不可期餘

生似酒那禁瀉憶昔還鄉沂巴峽落帆樊口高枕亞

長江滾滾空自流白髮紛紛甯小借竟無五畝繼沮

溺空有干篇凌鮑謝至今歸計負雲山未免孤衾眠

客舍少年辛苦真食蓼老境清閒如啖蔗饑寒未至

且安居憂患已空猶夢怕穿花踏月飲村酒免使醉

歸官長罵

邑人徐家麟追和東坡先生定惠院海棠詩化工春

麻城縣志

卷之四

建置

寺觀

來榮萬木雨露誰同復誰獨濃妝淡抹各爭奇未若

海棠嬌不俗一株迴出野芳中應是楚然到空谷初

疑天女降祗園又怪阿嬌謝金屋琥珀如搖鸚鵡杯

臙脂不貌驪驪肉憶昔劍南白髮叟會道千年看未

足碧鷄艷色絕天下想見山川氣清淑坡公遠謫故

山違一笑幽林閒捧腹欣如元亮對東籬快比子猷

逢好竹扶輿何處無奇產或隱深山逃眾目湘有芷

兮澧有蘭何必名花艷西蜀無乃張羅澤藪間仰視

瞥然失鴻鵠我聞千尋磊砢材水之涓涘山之曲原

脫觸字韻

邑人曹應昌蘇東坡遊定惠寺詩山逕迢迢入翠微

春深濃露溼人衣試隨稚子穿雲去偶遇山僧掛錫

歸臺閣何年成廢址禪光近日發新輝深山自古無

名利惟有仙花識者稀

邑人徐庭蘭秋日過定惠院訪坡公遺迹詩潦收木

脫寺門幽若有人兮坐百憂五見海棠歸不得一逢

山鬼謫何尤於今綠蘚封殘碣終古黃州詡盛遊滿

院蛩聲如詠史熙寧人去幾春秋

西峯寺在定惠寺之東

珠照寺進士周之夫生員周世錫建寺基幽厰山水繞拂遊人多覽焉

最上庵明天啟三年儒士喻儀建

法眼寺即黃蘗山僧無念道場

陳家廟亦名寶藏寺縣東南六里明進士戶部員外陳楚產住宅改建墓即葬於後貽有田地山場至今後裔守為香火奉祀之資廟中殿供劉關張神像

慧雲庵在東南七里岡明天啟閒巡撫梅之煥建內奉東

麻城縣志

卷之四

建置寺觀

六

岳神並諸佛像及崇禎二年流寇肆毒之煥建護生堡保護鄉人全活甚眾鄉人德之塑像享祀焉

東溪寺趾城十七里僧震音建山清水秀竹木叢集以上舊志附新增

芝佛寺在龍湖北岸建寺掘地得三芝類佛像因名今失

其一 一統志

邑人鄒知新芝佛寺記他寺也人寺之芝佛寺也天寺之天生靈芝曰異生靈芝結像成佛佛且三日尤異昔獲芝佛羣起感動相競為寺今去城東二十餘里松蒼石怪剝古湖平果能衣草葉持楞伽則水流清淨雲無是非解虎收龍不在高山而在芝佛寺閒近寺為河河中怪石嶙峋突出名釣魚臺遶臺皆水深不可測名龍

潭湖周柳堂先生別號石潭構樓名寒碧遊者一葦航
之昔石潭先生遇異人欲與同寢公厭其穢用舟送樓
中鑲之詰旦往伺封識宛然而人莫知所在畱一聯於
壁云兩個知心一個清風一個月十分豪興五分濁酒
五分詩公見懊恨久之四壁皆詹景鳳書其潭時而開
則汪洋千頃巨鱗細鮪以飯飼之游泳波面淤則平沙
漠漠惟有所故書以初潭二潭名海內人盛稱龍潭湖不
芝佛寺所謂知其不知其天也

鷄籠寺在縣東三十五里一名湛寂寺明萬厯時無念祖
師建有御賜藏經並陳妃所賜袈裟一件巡撫梅之煥題
為湛寂法門其寺左鹿角右遊蕩天然福地也

九峯寺在縣東南

麻城縣志

卷之四

建置
寺觀

七

邑人毛德翰九峯寺讀書記九峯山之梵王宮據山之
麓藏經閣在山之巔相去數百步皆金碧合成閣上有
巉岩怪石覆之禿木千株巢鶴無念之塔居焉時有
咳唾嬰鳴笙篁之鳥往來其間當閣之東壁牖也閣內
有洪武年間御藏封疊四壁有古佛羅漢守之閣下僧
房禪室千餘多金碧色僧飯時山足烟起如萬壑雲蒸
閣左右有門通彌勒殿雪室橫廊二百餘步柱礎疎密
相間如人拉坐杳然無際自彌勒殿至山門左右皆廊
二里許幽閒僻靜曲屈與山相倚簷有柏影掩映廊壁
有雪山諸洞天圖繪行其中如洞房深處雖風雨不知
也終日無人語閒有鐘聲笛韻鼓音鈴鐸來自山腰林
麓閒山門外多茶樹古屈婆娑伏岩草下如鐵拐仙崩
鬆伏氣也松柏數十里龍鱗黛色護石路旁野橋流水
遶折百十迴不去與鳥音相答作聲四月二十九日朝
霞未霽殿色凄其閉閣閱大學首篇閑檢天目中峯廣
錄伏案移時不覺山中雨過日色更鮮片雲篩之使明
暗相爭於樹梢岩底鷹翼爭揚鶴唳摩空古木參差碧
天更遠林閒草石纖纖可數楚楚院宇如翠合琉璃未

動幾於應接不暇燈瑩香裊麗眉雪面皆碧眼瞪人說
無限寒溫親人矣不知今夕何夕此地何地雲海沈沈
何必提起種種思量謫降人閒去也記之以遺他年一
段神遊清景恐一失後難摸索也

能仁寺距城六十里在龜峯之北相傳唐太宗建

雲臺寺在東山木樨何之曲巍然特聳上冲霄漢俯視諸

峯羅列其下又名豹腦岩相傳爲當年 福主殛蟒處

栢水寺在東南一百里唐高峯禪師建

鳳棲庵在土陂冲山清水秀宛如鳳形前邑令夏封泰因

易爲鳳棲焉僧碧霞普參海雲等俱確守清規至惠泉爲

掌教訓示有法目今宏義振興佛法其廟宇亦大有可觀

麻城縣志

卷之四

建置
寺觀

六

千佛寺在縣南十里舖知縣吳顧行改爲一佛寺寺濱大
河康熙閒大水汎溢有鐘自水面浮至寺門寺僧取之因
改爲鐘到寺鐘存今仍以一佛寺稱之

汲水寺明萬曆四十七年知縣莊應德建住持僧海棠清

修山門外有古松一株大數十圍鬱然蒼秀

靈覺堂在董家堡董天策闔族建

玉皇殿在白臬山之陰山高而頂平明天啟閒巡撫梅之

煥建

三教堂在白臬山之陽上中下凡三院明僧道一肉身藏

塔中有塔院藏經樓精舍皆傍巖倚石爲邑佳景士人
讀書其地

興福寺在白杲鎮西二里許唐貞觀乙巳真濟禪師建寺
僧以田爲業至今爲糧里之一明初盡爲軍民所佔有行
脚僧法全憤甚削竹爲鎗伺軍人耕者殺十餘人自詣縣
獄令義之欲釋焉全曰豈有殺十數人而不死者乎歸用
薙刀自刎寺傍至今號頸段山周柳塘李卓吾皆爲之傳
盛稱其事明初重修廟宇佛像甲於一邑有荆木梁銅盆
佛像沈水香皆唐時畱傳者寺僧浴佛始取用之至

麻城縣志

卷之四

建置
寺觀

九

國朝戊子始失去嘉慶閒邑人胡宗弟等募修佛殿及傍
殿同治壬戌邑人王大莖蔡駿璧等募修天王殿及關聖
殿廟仍其舊而僧舍未復被賊燬寺前有塘大數十頃蕩
漾若湖爲邑景之勝

邑人梁中斗興福寺詩古殿崔嵬劫外藏歸然不異
魯靈光斷碑猶記貞觀蹟小閣遙傳荆木梁一沼森
茫魚影亂五山層疊指紋張莊嚴佛國差相似梵磬
書聲半曲房

玉皇閣在白杲乾隆庚子年董秉恭後裔重修

福主廟在白杲董士宏士毅建

忠義寺在西南四十三里進士胡躍龍建寺側環河竹木

森列景致幽邃中祀武聖像故以忠義名

水口寺在拜郊城區明永樂閒知縣楊福四建

鐵佛寺與水口寺相望明萬厯閒同知楊王庭建中供大佛及諸神俱銅鐵像茂林修竹四望鬱然遊覽者鮮不至此地也

寶光寺在中館驛南瀕河

沙明寺在西南四十里邑人周損捐貲建茂林陰翳彌望平沙損與劉侗曾讀書其中

關帝廟在岐亭南城成化三年成族重建感應靈顯進士

麻城縣志

卷之四

建置
寺觀

三

彭信古遵古酬願各獻對聯後孟司馬酬願獻額裝金異常至今爲朔望行香首及之廟

文昌宮在岐亭南城外官前重建石橋曰觀察橋有聯云波水瀉文瀾任蘇海韓潮奔注都歸此地螺山排筆架萃江花毛穎發揮盡在吾徒楊玉柱題岡邑知縣陶國幹書添壽寺係天啟壬戌進士陶承謨爲福建提學時將馬頭山田庄山場大段建廟爲其父順祈壽顏曰添壽寺後設木主於其中子孫世祀焉又朝聖寺西陵寺亦在附近

香山寺在西南七十里御史趙訪建西側祠堂卽此子孫

歷代祭祀之所廟貌巍峩樹林掩映

大安寺邑西二十五里大安山中

東際寺邑西三十里黃泥坳僧慧聰建

聽松庵邑西三十五里西陽鎮明宣德楊萬戶裔四支全

建

董樸同劉養忠進士謝襲之舉人遊聽松庵四首久
仰雲峯寺同遊興不孤山僧持斲帚石逕掃寒蕪秋

老山容瘦天空鴈陣疏暮年精力健上下不須扶
殘秋尋勝概折馬向雲巒葉落林光淡山空月色寒

宦情垂老薄禪榻借眠安即此起凡境何須生羽翰
彌旬驅瘦馬不厭路程賒老去癡心發秋來逸興

嘉疏林藏暮藹滿地笑寒花喜有同袍客聯詩到日
斜 松島藏幽寺秋殘此共登身閑惟愛菊腳健遠

麻城縣志

卷之四

建置
寺觀

三

尋僧勸酒憑山鳥題詩借佛燈前山有佳景從僕不
須憎

紫荊寺在礦山

與石庵在明山側邑人梁雪亭為鐵首師建嘗讀書其中

邑人周禮與石庵序曩余過洞庭涉瀟湘經衡山之麓
望祝融煙霞諸峯未能辨其孰是舟中無事取輿圖披
閱知煙霞峯下為有唐白衣山人李泌讀書處心向往
之因念士君子方未遇於時伏處草萊其精神意氣必
有落落不與人合者或指為狂或謂為狷而及其見用
於世功業炳若日星道德重若川岳其向者伏處之一
隅一室相稱羨而艷傳於後世嗟夫是豈獨鄴侯然哉
今如吾邑之明山羊腸一線鳥道千盤為東偏門戶其
嗟峩一壁渾然危峭樵人牧子未易攀躋顧無有開其
生面者吾友梁子雪亭好奇士也暇日每遊憇於此別
石罅之土而洞之剪石徑之榛而蹊之就半畝之石而
亭之倚全龕之石而室之甘泉迸發野竹上霄雲母為

根別成邱壑其奇概在梁子自敘中而好事者又欲醜錢結宇題曰與石庵奉金粟於青芙蓉之上以永茲山勝事茲山之奇復不為梁子獨有吾政不知當鄴侯讀書時亦會有此同志士共發此奇情與否梁子方以儒者之學用天下而嗜禪最深又考昔懶殘道人撥芋以食鄴侯許其十年宰相彼時他人不獨不識鄴侯並不識懶殘兩人目光外射機鋒內含固已在語默動止之表矣乃與石庵成而鐵骨師一錫孤飛結趺宴坐不道其所從來與梁子中夜語不知何若而古今奇致畧同又有如此者為可嘆異也王陽明先生學本良知當世亦譏為禪夫致君澤民諸如理財治兵平刑勘亂皆於禪得之又何譏梁子試舉以問鐵骨師以為然否

大雄洞明進士周思敬建廟右有虎穴虎時出入其中因名大雄洞且山嶺崇峩竹樹蒼翠後周壻進士曹應昌於其地讀書甚賞之其作碑文今尙存

麻城縣志

卷之四

建置
寺觀

三

奉道觀邑西五十里

西陵寺明天順四年建崇禎三年重修距縣六十里近黃

安界門首古柏三株挺然獨秀

烟霞寺卽道觀磯顏題萬古烟霞康熙皇七子多羅渚

郡王書住持僧達清徒眾道興等置廟宇神像燦然一新

鄒洪緒春遊烟霞寺詩雲斂晴空矗碧霄招提隱現傍山腰石邊響落泉聲碎窗外青來竹影搖話到煙霞空色相聽殘鐘磬遠塵囂一林花鳥春風暖坐對禪房興未消

淨月寺原名隱谷庵在仙姑洞下僧慈容建廣聞重修

元妙觀邑北十五里明景泰間建

湧泉庵邑北四十里明刑部侍郎陳以聞建

鏡智庵邑北五十里僧波恬建康熙乙酉年重修以上舊志

萬家廟在宋埠區國初萬邦維同族建同治間勒有勒斷碑記

選佛廠在白果鎮開山僧曰巖清少業儒長而入釋中丞

梅之煥賞之隨徧參吳越宗主得法於靈隱具足大師後

歸鄉適關東卜居士宿皈依在鄂渚馳百金為結茅地時

地多鬼魅巖清力為拔濟人遂救寧皈依者甚眾遂創建

佛殿僧寮規模宏遠其徒旦標旦孚亦能了悟元奧光大

禪門歷百有餘年法嗣蕃衍近經粵捻之亂殘燬殆盡僅

麻城縣志

卷之四

建置寺觀

三

存佛殿而已

文昌宮在路口區道光閒郭尙道倡修募金外道自捐以

萬計又捐稞貳拾捌石作供奉費門首皖豫通衢往來輻

輳最為要道

眾興寺路口區廟在街北里許其廟最古向因眾姓置田

石餘作香燈費故名

柏子庵在總河口

紅廟在七里陂有寨前明避寇合區公建今廢其古井及

北門尚存

東嶽廟去紅廟寨里許隆慶間建內有古鐘

湖山寺在七里官湖北岸山山色與湖光相映頗有異景
騎牛坪廟在龜尾東余氏所建明一無祖師飛昇處

闕角皇經堂在木樨河沈宅右相傳道士刺血寫皇經甫
成飛去道士手捉之闕一角故名至今禱雨請經無不應
驗土人立廟祀之

中峯寺在二里河獅子巖有松風閣遺址閣後天然石級
數十丈鑿有上天梯三字釋楚珩飛昇處

龜形福主廟在木子店楊梅村咸豐元年重修適有落梅

麻城縣志

卷之四

建置
寺觀

二

河一人送黃荆一株來廟詢其故云前三日有一姓張人
付錢八百囑將此木送至此廟作梁眾知爲福主顯靈云
角叉山廟界聯木子店南庄二區係鍾姓香火付有田地
山場與廟僧

叢竹庵在下角叉山乃童姓香火付田地山場竹木甚廣
給僧供奉管業不准廢賣

高廟在官畝河明萬曆時建相傳神靈赫濯有人過科帽
馬過科鞍之說

寶磬寺在角兒尖明童應旨建廟成時羅邑獨尊山飛來

一磬聲清遠應故以此名寺

南庵界連南庄木子店唐時所建釋大智由定慧寺遷此悟道

靈峯庵在馬牙山明童天書建順治丁酉文煥弟兄重建一乘寺係東義洲區廟先名大聖寺改今名

反背廟在東義洲相傳廟門之外污穢疊積一夜忽將向掉轉故以此名後構有聯云問菩薩如何反背恨世人不肯回頭事另詳雜記

大士閣白水畝區廟有土人掘得石像觀音因建廟咸豐

麻城縣志

卷之四

建置寺觀

三

八年賊燬光緒二年春州同李紹桂同闔區重建

祖師廟在落梅河屏風巖每歲上巳楚皖豫三省之人多崇祀之

碧雲庵在馬牙山右庵後石刻云曉望三山青翠松濤清磬堪聞飛紅一天旭日堆白幾窟殘雲下數小字年久朦糊

梅國楨碧雲寺流泉詩峭壁生雲俱溼閒亭日自流乍來愁急雨久坐得高秋洗藥未過僧院隨花落御溝平生濠濮想對此亦悠悠

禪堂寺在邑東木樨河之西地極幽邃梅長公題額水雲

深處今尙存

凌雲寺在邑東二里河之銅斗岩元末邑人張評事學親建山水奇僻林木幽深至今士人多讀書其中

古柏庵在墩陽區前代程姓建以庵後古柏得名此柏中分二枝排立大數十圍高數十丈枝繁葉密翠蓋參天爲一方之望

泊石庵在墩陽區漸山之麓明季進士陳儒樸建庵後多洞巨石嶙峋奇怪萬狀樸隱居於此

萬古樓在懸鐘區祀百勝大王傳聞漢代張公失其名當

麻城縣志

卷之四

建置
寺觀

七

兵亂爲地方捍衛甚靈顯廟後石馬蹄跡宛然

三聖寺在甌山區供有夷齊及韓真人像

玉皇殿在石陂區明進士黃彥瓚建中有玉皇像 國朝

邑人黃瑞廷捐河口戶庄田七斗爲香火貲並祀東嶽帝龍湖寺與芝佛寺隔河相望河中有石臺卽釣魚臺明季李卓吾嘗講學於龍湖臺上建樓名寒碧臺側有洞卽李氏藏書所一時名宿耿楚侗周柳堂釋深有輩常駕小舟於此會晤

陳儒樸庚子巳同友人遊龍湖寺遇雨越次年竟以是日移居龍湖之側有同地各天之感詩云不出

桃花桃葉渡風風雨雨夢前期江干直作易名叟柳
際重吟古別詩蒼塢白沙一醉後孤雲殘月未眠時
今朝禊事誰同舉水檻停觴獨下帷

獅子庵在邑東二十五里鳳皇臺之西明崇禎間建羣山
繚繞疊嶂迴環廟宇崇峻林木邃密寺僧雄於貲為邑寺
冠然奉公好義自團防以及諸捐輸皆與有力同治中邑
侯楊公宗時獎以佛門好義額亦彼教之務實者也

寺僧海玉住持時有游客至葛衣墊巾蕭然拔俗僧
厚款之居久客曰無以酬惠請為作畫因進繪事入
一室常屏人久之出一獅一虎毛髮聳動目睛電灼
張之令人魄悚視其款識始知為中州賈瑀立齋又
久之辭去贈遺俱不受惟領一裘蓋異人也邑侯鍾
麟皋至寺曾題二圖俱為七古獅云一朝破壁飛騰

麻城縣志

卷之四

建置
寺觀

三

去長吼一聲天地空虎云收藏神勇聽鐘偈靜養禪
心一萬年皆其結句也邑侯鄭公硯香常跋其事今
住持為薰風師凡文人詞客游其地者無不請觀此
圖傳為佳話

大覺庵在三水灣之西平地一墩四圍壁立樹木陰茂寺
藏其中

圓通庵明嘉靖時建 國朝鄭熊二姓重捐修

無梁殿在墩陽區拔塵山之巔

香山寺 樂意庵 真指庵 亂峯庵

彌陀庵 琵琶庵 集雲庵 土主廟

以上墩陽區

廣靈寺 護國寺 雲山寺 茶庵

水口寺 楊家廟 鶴巢庵 龍王廟

雙廟

以上白沙區

西峯寺 輪雲寺 石引庵 石舟庵

李家廟 永福寺 雲谷庵

以上甌山區

朝陽寺 迴龍寺 大廟 圓照庵

枕流庵 經堂 聽松庵 接寢庵

麻城縣志

卷之四

建置寺觀

以上三杏區

般若庵

邑人周世進般若庵詩不出此林際石橋幽路通殘流
生夜籟遠樹淡秋容幾度分新綠頻來看落紅翛然遺
世外青暝一邱中

騎龍寺

以上懸鐘區

東照庵

右篤實區

天竺寺明了空開旗處

河下

太平寺在沙河區明表建堡名太平寨置有公田二石七斗一升

朝天寺在沙河區傅姓闔族建成豐初州同傅成裕捐貲重建勒有碑向有田二石五零

龍泉寺在象棋山周鄒尹三姓同建向有田三石六斗因事捐半作回車書院膏火一半仍歸寺供佛

巖山寺在陶家區夫子河巖山口石壁鐫有塔影高尺餘旁鐫成化七年三月八日邇來河道壅塞石壁平沙故及

麻城縣志

卷之四

建置
寺觀

三

見焉

觀音巖廟在橫河區山勢奇異歲時祈禱者眾與老觀音巖形勢畧同一在魯家區毛李衝每歲二月朝謁者眾一在沙井區鳴山寨內常昭靈應

唐建廟建自有唐在南秦村為曹家區公廟兵燹後闔區於同治間重建又康山寺

在曹家區

龍泉寺在義合區金堂堡外明嘉靖四年建
東照庵在義合區迴穆店西明天啟元年建

福緣庵在義合區仰天坪明嘉靖二年建

福主廟胡姓香火水口寺鄭姓香火西陵寺蘇姓香火禪堂吳姓香火

洒脫庵李姓香火以上望花區

雲霧山廟在寨內係魯姓香火貢家寺魯姓香火雷音寺茂林堂廟

以上魯家區

報國庵在邑西萬仞區明通守彭壽鼎建近臨舉水遠接羣山中有接引佛一尊面現明珠直如慧眼溯所由來其父信古東征勢迫投海援一木得脫携歸熟視上有明珠酷肖佛像夜輒放光儼如鑄成至今猶存

汪王廟明洪武間建中有一花五葉額天啟元年進士周

麻城縣志 卷之四 建置 寺觀 三

振題

準提閣康熙間進士萬邦維建

七家廟係合區內六戶公所章家廟係合區外八戶公所

龍坑廟 存仁寺 無垢寺 長齡寺

朝陽觀 永定寺 大勝寺 覺成廟以上深溝區

龍山寺在邑北上馬區明萬厯初重建 國朝乾隆間復

建同治三年被賊焚橫屋尙存同治五年築堡

玉皇閣在邑北柏樹嘴側明洪武時建道光咸豐間閣毀

其址尙存鐘磬猶明製

明國寺在邑北祖公山南唐德宗時修柏子塔皇叔虛應禪師曾過此門額明國寺三字大書唐王御筆親題

寶林寺在白臘區橫直四重山如龜形徑甚幽奧茂林修竹左右溪澗泉聲不絕有風春水確之妙神甚靈驗至今

朝謁無虛日

積微庵在高規區天鼓山山下有金牛潭釣台石金雞石昔邑令趙蒼壁題有不二法門額

雙龍寺明天啟知縣趙洪範等建崇禎丁卯梅之煥重建今額尙存在高規區岐鳳圖

麻城縣志

卷之四

建置寺觀

三

馮家大廟在宋杜區榷楓樹街南大路邊

萬緣亭在福田河街北每施茶以濟行人有田兩石四斗

朝陽寺 海院在張家店

雨曇廟在磨石 松筠庵即無事庵

戴家廟在磨石 玉皇閣 把口廟在護兒山

惠雲庵在鳳凰砦山下 鹿塵庵 以上張畱區

合成寺 淨瓶山 下馬廟 翠風庵

黃柏冲 鄧家堂 佛元寺在虎頭關

關口廟在虎頭關 以上宋杜區

三昧庵亦名蔣家堂在福臨堡西里許

十全寺在福臨堡西宋家畝

王家廟在福臨堡西南甘家壩

古佛庵在福臨堡西陶家冲

地藏庵在福臨堡西大堰河

清泉庵在宋社區西

騎龍庵即東去正界廟前接壤商邑地界

福主廟即西去正界廟前接壤光山地界

火王廟駐西界下右首進冲里許

麻城縣志

卷之四

建置寺觀

三

朱家大廟駐西界南來二三里許正大路之西

龍泉寺在路口街西大山後之南

三官堂在路口街西大山之北

文昌宮在兩路口道光丁亥郭義門建 以上路口區

折水徐躍兩路口新建文昌宮敘 國家愔庸典禮稱

秩元祀 至聖武聖廟外惟 文昌帝君崇事維嚴故

通衢雄鎮僻壤窮鄉凡夫聯鑣詩社樹幟文壇歲時會

課之區山水培風之地多建 文昌宮於其上 聖

澤宏敷土風丕振未有盛於此時者也信安北境兩路

口居光黃之界山環水複雲樹蔥蘢形勢家稱其蟠鬱

雄秀卜為人文發祥之所惟宜於市南創造招提俾宿

曜靈光與山水閒氣相膈合然而河漢斯言者匪伊一

歲矣余以嘉慶戊辰季秋月歸自京師過其地訪此處

詩書門第以探 恩闈榜信僉以郭氏稱因造其門主

人老幼出迎均端方有忠厚氣知其為禮法家者信宿盤桓辭章商確一門之內桂秀蘭芳語次輒欲建立文昌宮以培地脉言之切而詳且曰大厦非一木之支良喪非一狐之腋吾昆季有六行將約同志者十人湊成十六首領兼收公費以贊吾志庶幾眾力可憑觀成有日也厥後辛未甲戌丁丑三上公車款洽如故回憶傾蓋之初已十年矣自是束馬懸車不復北上而今又十年矣道光丁亥孟冬子姪試齊安攜郭君尊人義門先生書至乞敘於余始知路口文昌宮告成欣然喜曰丈夫舉事遠則裨益國家近則培植鄉里惟視志之堅不堅何患事之難與易哉夫事之難成孰有於築室者道謀不潰詩人憂之至於厥考作室厥子有弗肯堂構者矧合區之公事乎歷二十年之久費數萬金之多廟貌維新地方生色此豈立心勿恒者所能為以是嘆郭君昆季立志之堅而諸君子之同心贊助者又何其堅也吾聞光黃之間每多瑰才瑋學此宮也或可以會課於歲時可以培風於山水英儒瞻聞鴻筆麗藻影纓結駟上應景運以昭朝廷文治之化成者即於是乎

麻城縣志

卷之四

建置 寺觀

三

坊表

冢宰坊

為吏部尙書李長庚立

大金吾坊

為太子太保劉守有立

祖孫宮保坊

為劉天和劉守有立

繡衣坊

在儒學前為御史鄧楚望立

學士坊

為翰林院吏部侍郎劉鍾英顯忠校尉劉幼堪立

秉銓典禮坊 按察使陸鼇為吏部主事周思稷禮部主事周之夫立

尚書坊 為四部尚書劉采立

百歲坊 為誥封熊宜人立

翥鳳坊 為進士萬山立

都憲坊 為都御史鄒來學立

羣英坊 邑令聶賢立

憲臬坊 為副使王本儉立

雙亞魁坊 為熊經熊夔父子俱中第九名立

弈葉登榮坊 為參政董樸御史董振參議董經董石立

麻城縣志 **卷之四** 建置坊表

太保坊 為尚書劉天和立

烏府坊 為御史曾大有立

黃門坊 為給事曾大顯立

世科坊 為僉憲喻冲立

憲伯坊 為僉憲王宇立

京兆坊 為府尹劉淑相立

繡衣坊 為御史毛鳳韶立

育賢坊 在儒學前

青雲坊 在縣東街

經元坊 在南街為萬祥立

戊戌進士坊 在南街為熊經王本儉立

一脈甲科坊 在南街為董氏立

進士坊 在西門為周思久立

金榜題名坊

方伯坊 與在北街

由義坊 廣濟坊 明倫坊 俱在縣東

立政坊 宣化坊 通泉坊 永寧坊 甘泉坊

集賢坊 教化坊

麻城縣志 建置坊表 卷之四 三七

仙里坊 崇德坊 文會坊 拱辰坊

科甲傳芳坊 為曾氏立

恩榮坊 有二一在鎮口河為劉訓立一在霸陂為李觀立

經魁坊 在霸陂為李潤立

貞女坊 在縣前望岐門之西

孝友坊 在路口區街南道光閒貢生郭希宗弟兄奉

節孝坊 在縣東二里河區之南岡嘉慶閒李法元為母請

旌奉 旨建立相傳建坊之日有慈烏千萬 飛集其地馴擾不驚人以為孝徵也

